

輿地廣記卷第六

京東東路

望青州少昊之世有爽鳩氏虞夏時有季荊湯末有逢公伯陵
殷末有蒲姑氏皆爲諸侯國於此周成王時蒲姑氏與四國作
亂成王滅之以封太公是爲齊國所謂營丘後徙都臨淄亦其
地其後爲田氏所有秦滅之置齊郡漢高帝封子肥爲齊王後
爲齊郡亦屬北海千乘後屬齊國北海樂安兼置青州晉屬齊
國濟南樂安永嘉之亂陷於石勒刺史曹嶷爲晉守造廣固城
終爲季龍所陷季龍末段龕自號齊王據之慕容恪滅趙克青
州苻氏平燕盡有其地及苻氏敗苻朗以州降晉置幽州以辟
閭渾爲刺史鎮廣固隆安四年爲慕容恪所陷遂都之爲南燕
劉裕滅南燕以羊穆之爲青州刺史築東陽城而居之宋及後
魏皆置青州後周爲齊郡樂安北海隋並廢之大業初復置北
海郡唐武德四年曰青州天寶元年曰北海郡升平盧軍節度
皇朝淳化五年改鎮海軍政和元年曰齊郡今縣六

地六

京東東路

一

望益都縣本二漢廣縣地屬齊郡晉廢之廣固城在縣西四里
晉曹嶷所築有大澗甚廣因曰廣固城爲青州刺史治焉段
翕慕容德皆據此東陽城北卽郡治東城是也晉時城宋將
竺夔守之後魏攻圍不下益都本漢侯國武帝封菑川王子
胡爲益都侯故城在今壽光縣南元魏置益都縣北齊移入
青州城北門外爲治所後置齊郡隋開皇初廢大業初置北
海郡唐爲青州有五龍口劉裕圍慕容超於廣固塞五龍口
城中男女悉皆腳弱病者大半遂拔之

望壽光縣本漢博昌壽光縣地後漢晉並屬樂安國隋徙壽光
治所於博昌屬北海郡唐屬青州有淄澠二水有灌亭禹後
斟灌氏之國有紀國故城春秋紀侯國也漢曰劇屬北海郡

文帝十八年置甾川國後漢併入北海郡故城在縣西南
緊臨胸縣二漢臨胸昌國縣並屬齊郡晉省臨胸入昌國隋開
皇六年改昌國爲逢山大業初改曰臨胸屬北海郡唐屬青
州有伯氏駢邑

上博興縣本漢樂安縣屬千乘郡後漢屬樂安國晉省之其後
復置隋改爲博昌屬北海郡唐屬青州後唐避諱改爲博興
上千乘縣漢舊縣後漢屬樂安國晉省之後復置爲樂安郡治
隋開皇初郡廢以千乘屬北海郡唐屬青州有薄姑城商末
爲諸侯居此周時與四國作亂成王滅之有遄臺齊景公飲
酒於臺上曰古而無死其樂若何晏子對曰昔爽鳩氏始居
此地季荊因之有逢伯陵因之蒲姑氏因之而後太公因之
古若無死爽鳩氏之樂非君所願也顏師古言武王初封太
公於齊未得爽鳩氏地成王以益之在漢博昌縣地

地六

京東東路

二

上臨淄縣城臨淄水故曰臨淄卽營丘也周封太公於此南郊
山下有天齊淵齊所以爲齊以天齊也戰國時齊威王項羽
封田都漢齊悼惠王皆都之後置齊郡後漢晉爲齊國元魏
爲齊郡北齊廢之隋開皇十六年復置屬北海郡唐屬青州
漢西安縣故城在西北本曰渠丘齊大夫雍廩之邑有葵丘
牛山時水

上密州戰國時屬齊秦置琅邪郡漢屬琅邪郡及高密城陽一
國後漢屬琅邪郡北海國晉屬城陽郡元魏屬高密後置膠州
隋開皇初郡廢五年改膠州爲密州大業初州廢復爲高密郡
唐武德五年曰密州天寶元年曰高密郡 皇朝開寶五年
升安化軍節度今縣五

望諸城縣本漢東武諸二縣地東武爲琅邪郡治所後漢屬琅
邪國晉屬城陽郡後魏置高密郡隋開皇初改爲密州十八

年改東武爲諸城大業初復爲高密郡唐爲密州諸本魯邑春秋城諸及鄆是也漢屬琅邪郡後漢屬琅邪國晉屬城陽郡元魏屬東莞郡其後省入東武至隋改焉漢琅邪縣在東境初越王句踐欲霸中國徙都於此起觀臺於山上周七里以望東海秦始皇置琅邪郡後東遊過齊登山大樂之因留三月乃徙黔首三萬戶於山下刊石立碑紀秦功德漢武帝亦登焉晉省琅邪縣後復置元魏屬平昌郡後又省隋開皇十六年置縣曰豐泉大業初復改爲琅邪唐省之

望安丘縣本莒之渠丘也漢爲安丘屬北海郡後漢屬北海國晉屬東莞郡元魏屬平昌郡其後並廢隋開皇十六年置牟山縣大業初改名安丘屬高密郡唐乾元二年以安祿山亂改爲輔唐 皇朝開寶四年復爲安丘漢梧城朱虛昌安三縣故城在此

地六

京東東路

三

望莒縣古莒國戰國時燕將樂毅破齊獨莒不下漢文帝置城陽國以封朱虛侯劉章光武併入琅邪國魏晉復置城陽郡後魏置東莞郡北齊郡廢屬義唐郡唐初廢之以莒屬琅邪後屬密州漢海曲縣故城在縣東呂母起於此

上高密縣縣有密水故以爲名漢文帝置膠西國宣帝本始元年更名高密國後漢屬北海郡魏晉屬城陽郡隋屬高密郡唐屬密州漢夷安縣屬高密國本春秋萊國之夷維邑晏平仲其邑人也後漢屬北海郡晉以來省之唐武德六年移高密治故夷安城淳于本春秋州國漢爲縣屬北海郡後漢屬北海國晉屬城陽郡元魏屬平昌郡北齊省入高密

膠西縣春秋介葛盧國二漢爲黔陬縣屬琅邪郡晉屬城陽郡元魏屬高密郡後置平昌郡隋開皇初郡廢十六年置縣曰膠西大業初省黔陬入焉屬高密郡唐武德元年省膠西入

高密後以其地爲板橋鎮 皇朝元祐三年復置膠西縣
上齊州春秋戰國皆屬齊秦屬齊郡二漢屬濟南平原東郡晉
濟南郡領平壽下密膠東卽墨祝阿五縣而以平壽爲郡治方
今考其屬邑乃漢北海平原膠東地非濟南地也或云魏平蜀
將徙其豪將家於濟河北改爲濟岷郡而太康地理志無此郡
名豈永嘉喪亂簡編散落故失其傳乎宋爲濟南郡兼置冀州
後魏改爲濟州隋開皇初郡廢大業初州廢置齊郡唐武德元
年曰齊州天寶元年曰臨淄郡五年曰濟南郡 皇朝治平
二年升興德軍今縣五

緊歷城縣二漢屬濟南郡宋元魏爲郡治焉隋置齊郡唐爲濟
州有歷山漢韓信度平原襲破齊歷下軍卽此有華不注山
左傳晉郤克敗齊師逐之三周華不注是也漢東平陵縣本
譚國二漢爲濟南郡治其後郡徙歷城而平陵遂廢唐武德

地六

京東東路

四

二年置譚州并平陵縣正觀元年州廢屬齊州十七年齊王
祐起兵平陵人李君求據縣不從因改名全節元和十五年
省入歷城漢臺縣故城在縣西

緊禹城縣本祝柯齊邑也春秋襄十九年諸侯盟于祝柯卽此
二漢曰祝柯屬平原郡晉屬濟南郡隋屬齊郡唐屬齊州天
寶元年更名禹城東有野井亭齊侯唁魯昭公之所

中章丘縣本漢陽丘縣屬濟南郡後漢省之後置高唐縣隋開
皇十六年改爲章丘屬高密郡唐屬齊州有東陵山盜跖死
處臨濟鎮本漢朝陽縣隋開皇十六年改曰臨濟別置朝陽
大業初省入焉唐屬齊州 皇朝咸平四年省入章丘管
縣二漢屬濟南郡晉以後廢之地入臨濟

中長清縣本齊之石窰邑二漢及晉爲盧縣地隋開皇十四年
置長清縣屬濟北郡唐屬齊州武德元年置山荏縣二漢荏

縣也屬泰山郡天寶元年改爲豐齊元和十五年省入長清中臨邑縣二漢屬東郡晉及元魏屬濟北國隋屬齊郡唐屬齊州有石門有盧縣故城春秋齊侯鄭伯盟于石門尋盧之盟是也有朝陽城漢朝陽縣也屬濟南郡後漢爲東朝陽屬濟南國晉屬樂安國其後廢入臨邑

上沂州春秋時齊魯二國之地戰國時屬齊楚秦屬琅邪郡漢屬琅邪東海二郡後置琅邪國魏晉因之宋爲琅邪郡後魏置北徐州後周改爲沂州隋開皇初郡廢大業初州廢復爲琅邪郡唐武德四年曰沂州天寶元年曰琅邪郡今縣五

望臨沂縣本魯地春秋城中丘在縣東北二漢屬東海郡晉屬琅邪國隋爲琅邪郡唐爲沂州漢卽丘縣故城在縣東南本祝丘春秋夫人姜氏享齊侯于祝丘是也二漢晉皆屬琅邪國隋大業初省入臨沂漢開陽縣屬東海郡本郟國也後更

地六

京東東路

五

名啟陽春秋叔孫州仇帥師城啟陽是也漢避景帝諱改爲開陽後漢晉爲琅邪國治其後廢入臨沂故城在縣南漢襄賁縣屬東海郡後漢及晉皆因之其後廢入臨沂故城在縣南

望承縣本漢丞縣屬東海郡後漢晉因之隋大業初改丞爲蘭陵屬彭城郡唐武德四年復更爲承以縣置鄆州正觀元年州廢來屬蘭陵鎮戰國時屬楚春申君以荀卿爲蘭陵令二漢晉屬東海郡元康元年置蘭陵郡其後郡縣俱廢唐武德四年置蘭陵縣正觀元年省入鄆故鄆國漢屬東海郡後漢晉皆屬琅邪隋大業初省入丞

望沂水縣漢東莞東安二縣地東莞本莒之郟邑魯取之漢屬琅邪國晉太康中置東莞郡隋屬高密郡後省入東安東安漢屬城陽國後漢及晉屬琅邪國其後改沂水縣及南青州

東安郡後周改州爲莒州隋開皇初郡廢改縣曰東安十六年又改曰沂水大業初州廢屬琅邪郡唐屬沂州有沂山禹眞沂水所出有浮來山春秋公及莒人盟于浮來是也有穆陵山昔召康公陽齊太公履南至于穆陵卽此漢陽都縣春秋陽國也漢屬城陽國後漢晉屬琅邪國其後廢焉故城在縣南有大峴山爲齊南境其地險固晉將劉裕伐南燕大將公孫五樓請慕容超據守大峴超不從故敗

望費縣魯季氏邑公山弗擾以費畔卽此漢屬東海郡後漢屬泰山郡晉屬琅邪國隋屬琅邪郡唐屬沂州有蒙山禹貢所謂蒙羽其藝是也顓臾城在縣西北魯附庸國爲東蒙主冉有以爲固而近於費勸季氏伐之隋開皇十八年改南武陽曰顓臾屬琅邪郡唐正觀元年省入費漢南武陽縣屬泰山郡後漢及晉因之有顓臾城隋因改焉故城在縣西漢南城縣屬東海郡後漢屬泰山晉屬南武城卽古之武城子游爲宰有弦歌之聲處也故城在費縣

地六

京東東路

六

中新泰縣本漢東平陽縣屬泰山郡後漢省之晉復置惠帝元康元年改爲新泰屬泰山郡隋屬琅邪郡唐屬沂州漢蒙陰縣屬泰山郡後漢省之晉復屬琅邪國北齊省入新泰故城在縣東南堂阜在東齊地也有夷吾亭管仲以囚自魯歸鮑叔解其縛於此

上登州春秋牟子國戰國屬齊秦屬齊郡二漢晉屬東萊郡元魏置東牟郡隋屬東萊郡唐置登州天寶元年曰東牟郡今縣四

望蓬萊縣本漢黃縣屬東萊郡後漢爲郡治所晉屬東萊國元魏置東牟郡北齊廢東牟入長廣郡隋開皇初廢長廣屬東萊郡唐如意元年置登州初治牟平神龍三年更名黃爲蓬

萊徙治焉

望黃縣漢舊縣唐神龍三年更名蓬萊先天元年析蓬萊置黃縣屬登州有萊山漢轅縣地在此有蹲狗山

緊牟平縣二漢舊縣屬東萊郡晉省之後復置隋屬東萊郡唐屬登州漢東牟睡縣地在此有東牟山之罍山秦始皇漢武帝嘗登之

中文登縣漢不夜睡縣地屬東萊郡後漢以來省之北齊置文登縣後周因之隋屬東萊郡唐武德四年置登州正觀元年州廢如意元年屬登州有文登山有成山漢武帝禮日於成山卽此有不夜城古有日夜出見於東萊故萊子立此城以不夜爲名有秦始皇石橋

中萊州禹貢所謂萊夷作牧之地春秋爲萊國齊侯滅之遷萊子於邠戰國屬齊秦屬齊郡二漢爲東萊郡晉爲東萊國宋爲

地六

京東東路

七

東萊郡後魏兼置光州北齊後周因之隋開皇初郡廢五年改州曰萊州大業初州廢置東萊郡唐武德四年曰萊州天寶元年曰東萊郡今縣四

望掖縣漢高帝置東萊郡後漢郡徙治黃晉復爲郡治焉後魏以來因之隋開皇初郡廢大業初復置唐爲萊州有掖水因以名縣有三山有萬里沙見史記封禪書漢曲成當利二縣在此

望萊陽縣二漢昌陽縣屬東萊郡晉省之其後復置隋屬東萊郡唐屬萊州後唐避廟諱改爲萊陽有奚養津周禮幽州其藪奚養

望膠水縣本漢長廣縣地屬琅邪郡後漢屬東萊郡晉咸寧三年屬長廣郡其後郡廢復屬東萊郡隋仁壽元年改曰膠水唐屬萊州

中卽墨縣燕將樂毅破齊唯田單守卽墨不下卒破燕軍項羽立田市爲膠東王都此後屬齊漢文帝十六年復爲膠東國後漢國廢屬北海國晉屬濟北郡北齊省之隋開皇十六年復置屬東萊郡唐屬萊州漢不其縣屬琅邪郡後漢屬東萊郡晉置長廣縣其後郡廢北齊省之隋開皇十六年復置尋省入卽墨故城在今縣西漢壯武縣屬膠東國故夷國也左傳紀人伐夷卽此後漢屬北海國晉屬城陽郡其後廢焉故城在卽墨西有沽水左氏曰沽尤以西卽此

上濰州春秋戰國皆屬齊秦屬齊郡二漢爲北海郡晉爲濟南國元魏復置北海郡北齊改郡曰高陽隋開皇初郡廢十六年分置雄州大業初州廢屬北海郡唐初置濰州尋廢屬青州皇朝以青州北海縣置軍後升爲濰州政和元年曰北海郡今縣三

地六

京東東路

八

望北海縣本漢平壽下密桑犢縣地後漢省桑犢餘屬北海國晉以平壽置濟南郡下密屬焉元魏復爲北海郡北齊改曰高陽隋開皇三年罷郡置下密縣於廢郡城大業二年改爲北海縣而別置下密唐武德二年以北海置濰州八年州廢省下密入北海屬青州 皇朝建隆三年置北海軍乾德二年升爲濰州有斟亭禹後斟尋氏之國有寒亭羿相寒浞之國有漑源山漑水所出古所謂覆甑山也

望昌邑縣二漢都昌縣地屬北海郡元魏屬北海郡隋因之後省爲北海縣地 皇朝建隆三年析置昌邑縣有濰水出箕山北至都昌入海漢末北海相孔融爲黃巾賊管亥所圍劉備救之於此

緊昌樂縣二漢營陵縣地屬北海郡晉屬高密國元魏屬平昌郡後改爲營丘北齊廢之隋開皇十六年復置屬北海郡唐

正觀八年省入北海
縣尋改爲昌樂

皇朝乾德三年以營丘城置安仁

上淄州春秋戰國皆屬齊秦屬齊郡漢屬濟南樂安國後漢因之晉屬樂安國後魏置東清河郡北齊郡廢隋置淄州大業初州廢併入齊郡唐武德元年置淄州天寶元年曰淄川郡今縣四

望淄川縣本漢般陽縣地屬濟南郡後漢屬齊國晉省之後魏置貝丘縣及東清河郡北齊郡廢隋開皇十六年置淄州十八年改貝丘爲淄川屬齊郡唐屬淄州有淄水出泰山萊蕪縣原山東北過臨淄縣東又東北過利縣東又東北入於海漢萊蕪故城在東南菑川國亦在此古齊長城

中長山縣本二漢於陵縣地屬濟南郡晉省之後置武彊縣隋開皇十八年改曰長山屬齊郡唐屬淄州有長白山陳仲子夫妻隱處

地六

京東東路

九

中下鄒平縣古鄒國二漢屬濟南郡晉曰鄒屬樂安國後改爲平原縣隋開皇十八年復曰鄒平屬齊郡唐屬淄州

下高苑縣漢屬干乘郡後漢晉屬樂安國北齊改曰長樂隋開皇十八年改曰會城大業初復名高苑屬齊郡唐屬淄州漢被陽縣在此漢狄縣田儋兄弟殺狄令起兵於此漢屬干乘安帝永初二年改爲臨濟屬樂安國其後省入高苑

同下州淮陽軍春秋戰國屬宋魯秦屬薛郡漢屬東海郡後漢爲下邳國晉宋因之梁爲武州及下邳郡後魏爲東徐州後周爲邳州隋開皇初郡廢大業初州廢復屬下邳郡唐置邳州後州廢屬泗州又屬徐州 皇朝置淮陽軍今縣二

望下邳縣夏時奚仲自薛徙此秦末爲東陽郡治秦嘉其邑人也韓信爲楚王都此國徐屬東海郡後漢永平十五年置下

邳國晉宋因之城有三重大城南門謂之白門曹公擒陳宮處也中城呂布所守也小城晉荀羨郟曇所治也梁置武州下邳郡後魏置東徐州後周置邳州隋皆廢之後復置下邳郡於宿豫而以下邳縣屬焉唐武德四年置邳州正觀元年州廢屬泗州而省郟良城淮陽三縣入下邳元和四年屬徐州皇朝太平興國七年置淮陽軍縣處沂泗之會城東南有小沂水水上有橋楚人謂橋曰圮張良遇黃石公於下邳圮上卽此葛嶧山在西禹貢所謂嶧陽也郟縣故己姓國春秋郟子來朝是也秦置郟郡二漢晉皆爲東海郡治兼爲徐州刺史治焉後魏復置郟郡隋開皇初郡廢屬下邳郡唐省之故城在縣北良城縣左傳昭十三年晉侯會吳子于良是也漢屬東海後漢晉皆屬下邳梁置武原郡隋開皇初郡廢屬下邳唐省之淮陽縣在漢凌縣泗陽之間有淮陽城梁置淮陽郡東魏置綏化縣後周改爲淮陽隋開皇初郡廢屬下邳唐省之漢睢陵縣故城在此

中宿遷縣秦下相縣地城在西北項羽卽此人也屬臨淮郡晉元帝督運軍儲以爲邸閣因置宿豫縣及宿豫郡焉明帝大寧中兗州刺史劉遐自彭城退屯泗口卽此安帝義熙中置城在今縣東南臨泗水南近淮水自後爲重鎮後魏太和中南徐州治此後省州爲戍隋開皇初廢宿豫郡以縣屬下邳唐屬泗州寶應元年避諱改爲宿遷屬徐州皇朝太平興國七年來屬

地六

京東東路

十